

## Velić: Želim da u Tuzli napravimo lijepu košarkašku priču!

Četrdesetšestogodišnji Livnjak, Ivan Velić, treći je trener tuzlanske OKK Slobode u ovoj sezoni.

Prije nekoliko dana razgovor s njim u Zadru, gdje je kao pomoćnik izborniku Ivici Skelinu očekivao susret reprezentacija Hrvatske i Holandije, koju je uzgred rečeno dobila domaća selekcija, obavio je Aid Berbić, predsjednik tuzlanskog kluba.

Ivan Velić, novi trener OKK Slobode (Snimio: Miroslav Petrovic)

Velić, koji je najveće uspjehe ostvario kao šef stručnog štaba Širokog, prihvatio je ulogu spasitelja OKK Slobode kojoj predstoji borba za opstanak u prvenstvu BiH.

Šta ga je motiviralo da iz srca Dalmacije dođe u „zaleđenu“ Tuzlu, govorio je dok je žurio da stigne na večerašnji trening igrača novog kluba.

– Motiva dakako ima više. U razgovoru s ljudima koji su me pozvali, zaključio sam da imaju ambicije dignuti klub na veći nivo i to me privuklo. Da ne govorim o navijačima i košarkaškoj atmosferi kakva vlada u Mejdanu. Smatram to izazovom i vjerujem da mogu napraviti dobar posao – rekao je Velić u razgovoru za Fenu.

Kaže da je trenutno kao klupski trener bio bez posla, mada je imao nekih ponuda i opcija, ali “nikada se ne zna šta može iskrsnuti kad se najmanje nadaš”.

– Sigurno da u Tuzlu dolazim s velikom motivacijom da uradim što više u narednih mjesec i pol, a poslije ćemo sjesti, uprava i ja, i razgovarati o tome je li saradnja bila obostrano korisna i hoćemo li nastaviti dalje – dodaje.

Podsjeća da je posljednje dvije sezone vodio ekipe šibenskog Jollya i Krke iz Novog Mesta. U Šibenskom klubu napravio je dobar posao, ali se dogodilo nešto što je malo ko pretpostavljao.

– U prošloj sezoni smo ostvarili najbolji rezultat, klub je bio odlično organiziran, ali se onda jednostavno desilo da je čovjek koji je vodio klub odlučio da ga ugasi. To je tako, ne možeš predvidjeti gdje će te odvesti put, ali ono što trenutno mogu garantirati jeste da ću dati sve od sebe da u Tuzli napravimo jednu lijepu priču i da ekipa izbori opstanak. Na žalost to je tako, mada znam da je OKK Sloboda imala mnogo veće ambicije od toga – napominje Velić.

S obzirom da je Velić trenutno u stručnom stožeru reprezentacije Hrvatske, kaže da mu te obaveze neće smetati da uradi ono što je potrebno u OKK Slobodi.

– U pitanju su kvalifikacije koje dugo traju i slijedeća utakmica reprezentacije Hrvatske bit će tek krajem šestog mjeseca. Do tada ću završiti posao u Tuzli, tako da mi to neće predstavljati poteškoću.

U stručnom stožeru zadržat će sadašnje trenere Kavgića, Žunića i Sakića, za koje je čuo da su dobi momci.

– Naravno da smo razgovarali i o drugim stvarima. Ali, tek kada obavim posao za koji sam doveden. Dakle, da u što kraćem roku snimim stanje, vidim ko je kakav igrač, pa i trener, i na kraju da vidmo hoćemo li produžiti saradnju.

Ne zna hoće li sutra voditi ekipu novog kluba u važnoj utakmici protiv mostarskog Studenta, ali to ne smatra najvažnijom stvari.

– Najvažnije je da OKK Sloboda sutra pobijedi, a nebitno je ko će sjediti na klupi – zaključio je Ivan Velić, novi trener OKK Slobode.

Na kraju smo rekli da u arhivi imamo više njegovih fotografija, samo ne znamo ima li više sijedih u kosi.

– Da, ima sijedih, ima puno više -nasmijao se trener koji u Tuzli uživa dosta simpatija, kao i reputaciju strogog, ali i kvalitetnog trenera. (Miroslav Petrović, Fena)

Date: 27-02-2018